

四庫全書

集部

欽定四庫全書

集部

弇州續稿卷五

六五

詳校官編修

臣潘庭筠

中書

臣劉源溥覆勘

總校官進士

臣楊懋珩

校對官檢討

臣郭寅

謄錄監生

臣許祖懷

謄錄監生

臣藍嘉瑄

欽定四庫全書

弇州續稿卷五

明 王世貞 撰

詩部

五言古

肖甫有中山開府之報喜而有寄

衡門掩疲病稍與塵事絕崢嶸歲莫天覆盆何由雪忽
枉故人問令我屐齒折尚書尺一下符璽行當發感金

雙螭螭天子所賜鉞鐵冠嶷其角豸繡殷猩血內臺捩
眼鼻左輔當喉咽始知中山篋更成中山節太陽吐朝
暉羣翳俱消滅崇蘭汎賓筵敵蕙成私悅榮卑雖異勢
物性區以別子其奮馳驚余衰安寂蔑

奉安道經一藏於閣西室敬述

太上攜衆真逍遙于玉清蟻觀下土士穢濁銅三靈慈
憫激流微貫珠自泠泠精微綴宸章錯繡何青熒軒轅
啟陰符玄女駐緇輶靈威挾潜宮禹文不沈冥隱約五

千言致彙澹無營
泔漾漆園叟游戲與道并
內景散並珠洞玉啟丹局南真紆初秘緣
噉在興寧濫竽昉靈期
殺玉寶光庭及乎宣和季
紫色復蠅聲誤解抱朴書
九咽酸煙生妄謳紫陽咏
悅焉喪其精罔象獲玄珠
中智謂非誠將配西天言
及我東魯經含輝各垂照
皦若日月星澄乳出醞醕
和美故無爭分流雖殊派
不悖當並行小兆匪南董
慨焉慕赤明上論九玄度
下紀萬椿生竊從玄卿後
良常勒新銘

孔陽宗侯有亭曰依隱亭四傍皆竹余為賦之

東方昔翫世大隱金門側

朔傳云依隱翫世

之子固沈淪宗正

通屬籍家有淮王招人歌歲星謫飽飧淇澳菴嘯弄瀟

湘碧唐李百萬葉疎者曰太白結友栖竹溪舉世宗六

逸子亭以子名子名借亭得試一展吾詩是否人間色

周郎蚤夭項女未適而死殉之合葬於周

君是岐路人女是父母身父母業已許那能不屬君君

今既玉折女豈獨瓦全生當愧白日死當快黃泉丹旌

從東去素旄從西來兩旄東西合纏綿不得開黃蘗化
為松那知苦中久十六項家女千年周家嬪君面女不
知女心君應得不似郅家兒倉舒渾未識團圞女貞樹
煜若銀河洗不似韓憑木將情作連理伯夷豈殷民為
殷表君臣首陽一杯土萬古歸其仁我欲竟此曲此曲
悲且長結為金與石融為冰與霜

題雙松卷蓋嶺南蕭公之手植而其子別駕君讀
書其下者也

赤松游南海手實貽蕭郎自云溫山種鸞鳳所庇藏峭
清雙喬柯矯若龍雙翔東樹延夕春西枝媚朝陽歸雲
不隻栖偃蓋必相當謾謾元禮風勁節抗玄霜颼颼弘
景颼清音韻素商有子饌銅盤書聲出琅琅丁夢終見
叶賈對良豈荒下當種靈珀上當棟明堂寧學家少府
齋前俱白楊

答贈曹子大同

荆玉游中土連城不復償武夫迫相淆璠璣蔽其光所

以神自泣黯然思陵陽空谷產猗蘭無人自芬芳蒹葭
羣來狎根株不相當所以希拂拭願登君子堂淮南富
耆碩曹子乃其良漁獵六代藪馳騁百氏場五十困公
車六十釣滄浪著書累萬言不博俸一囊鵲雀暮來棲
萬目呼鳳凰竊悲千秋瑞長鍛五色章惠而好我音攜
我以同行知已何必多寸心暴秋陽結交何必早歲晚
見冰霜

敬美弟杜門信州移文乞休賦此寄之

寒霜日夜零廓落成晏歲羈羽坐空條疇能不愁思愁
思望故鄉安為久留滯故鄉足稻粱處者甘其惠伏羅
更以詳忽來誠可畏不覩雙飛鳳摩空適其志晦顯何
足陳無營乃為貴

其二

侯生縻抱關會計委宣尼不復知身賤焉知貴為誰大
塊博物形自古多參差得失若浮萍汎者偶值之高位
多折腰韋縞乃信眉黃鵠游於田尺鷃笑其卑狎世誠

非易避人良豈宜

其三

彭蠡匯大江洪波浩洋洋零雨久滯淫牛斗攝其光匣
中雙飛龍生不剗名王一旦埋槁壤時時嘯寒霜

關

貌若蘭不因風菲芳盛年中自失垂晚怨朝陽逝晷不
我還撫壯當自詳無為愛一壑坐使玄鬢蒼

題小桃源圖

出郭只十里種桃近千樹主人非避秦亦不嫌客顏有

酒且賞花酒盡應須去試語劉麟之何如此中住

胡楚玉法門之龍象也雖混跡居士而超契應真

一旦別余游五臺禮文殊大士感此賦古體一

章以贈

五臺小五嶽梵天作真境一嶽為一臺秀出太行頂青

分鷲嶺潤白破雞足暝七寶蟠紫空

樹也

三珠噴香井

泉名

靈花時自秀法雨長夏冷吾聞古師利結法當茲嶺不

避老宿嫌時時神猊騁楚公乘古來少小發精猛服從

居士便心作苾芻靜托鉢行別余去去入幽迴聖燈悟
來現佛日塵內永不畏毒龍攝所畏在光景若叩清涼
臺脩然在衣領

贈卓徵甫光祿見訪弇園作

我愛卓王孫雋聲滿人口牀頭一鸛鷀時時為客有已
工光祿吟復耽步兵酒白榜叩紫荆青絲繫楊柳不為
噉名來能談塵外否

凌大夫且適園

為園何必廣聊以答吾寄勝從蘋洲采嫩許鄉林婉水
石有真色桑榆信所植好雨東南來百卉欣自媚時禽
宛宛鳴儵魚悠然逝念彼非有托叶此成偶契谷愚豈
真徙河清焉可俟尺鷃與雲鵬逍遙不相倍有待終愧
煩無營乃為貴

王丈汝止偕張牧過祇園作

皇穹不愛道爰產良知翁奔走舉世豪先生得其宗說
法五十年甘雨天南東張牧如平陽避舍舍蓋公輕搭

白接羅坐我祇園風恢諧與觴藥盎然皆春融我聞羅
什師時時邇淫躬及乎飯棘針亦與常飯同乃知青蓮
華無妨淤泥中語罷一自笑廓落高天空

唐伯虎畫牡丹下睡猫題者不甚快意因戲為作
之

白日當卓午狸奴睛一線胡為尚頽然曲肱掩其面得
非薄苛醉母乃干陬倦風吹木芍藥時時墮芳片墮者
作裊褥留者充帷席高卧時未至雄才晚方見縱橫羣

鼠輩未解事機變牙爪攢戟霜飛騰掣弓電詎止無當
鋒誰與敢奔殿剗裂懲狡貪吮咀慰酣戰能令此輩空
不愛通侯券丹青何人手唐子少豪健賣駿足偶蹶屠
龍技方賤韜精恣鼓跌含意在荒晏鮭鰕苟不乏猫鼠
各自便猶勝李嵩州搖尾媚娘殿蕭妃以媚娘他生當
為鼠也嵩州即李猫
送印上人歸銅梁詩有序

上人銅梁人也十九薙髮從師求道尋入鐵圍
山內觀久之恍若有悟乃徧游叢林叅訪耆宿

證其所得西登五臺瞻禮文殊道場因附舟渡
江栖止諸名利一日別余曰吾且歸銅梁矣余
謂上人猶有銅梁在乎上人無答亡何所齋衣
鉢為一行者持去上人示悴色而語之余謂上
人猶有衣鉢在乎復無答已而又曰行矣必得
子之一言而重余謂上人猶有不佞之一言在
乎復無答余謂此世法也苟順世而無罣礙歸
銅梁與不歸俱可衣鉢之存與失俱可得佞

之一言與不得俱可子之鄉有崕峽先生者能
順世者也試以予問質之於是上人行而余為
一古體以贈且用青蓮句作起語

大師銅梁秀托鉢婁江潯向余忽西笑笑指邛山深出
既無定所歸應無住心吾聞梵天界步步蓮花金茲地
且不戀況乃思故林兩足隨世緣耆宿有知音

題弇山園

惟古弇州西國以君子稱其人皆胡耆少者亦錢鏐中

有五色鳥仰吭向天鳴
金母餞周滿琬琰鑄令名
海上吐三山儼若芙蓉城
雲根秀特出風巖類削成
游者詫天工焉知人所營
轉徙一畝宮其寬不容肱
徇情豈不怡余適乃忘情
長生豈不佳余學在無生

題離資園

昔當邁時屯掩跡遯閭井
所難近市喧復深在原
警選地不在遐步武得佳
境雲來白石古雨去蒼苔
靜淪茗熟妙香為我迴
醅酌指麾勤剪刈毋使資
業逞斯物豈

余雖言虞為芝蘭梗晚途悔別擇返心皈平等怨戚與愚
賢相將共箕穎

題澹圃

吾弟善為幻荆榛忽繁麗春風滿天來為汝雕萬景綺
目無不足炙口有餘脆時維八九月獨往足余憇水涸
天根見木凋地肥既丹蘄俱剝蝕唯餘一真際進我天
人糧脩然禪悅味冶游諸少年五都競為媚母以雞肋
觀奪我羊棗嗜

題約圃

余有先人廬不能飭衡荆樵蘇來共之鳥雀自從橫吾
兒慕老圃聊為一經營梅桃凡幾樹脩竹百餘莖取勝
唯一池弱不任揚舲茅屋八九間文之軒若亭小丘僅
踰仞強亦以山名又復名其圃曰約差勝盈君看芥子
中須彌了不贏

入弇州園北抵小祇林西抵知津橋而止

維東有蕭寺澄潭面若鏡步武稍逶迤林香發幽興茶

縻組春翫橘柚文秋飮祇林未易攀仙源或堪偵胎禽
引圓吭萬樹竅相應游履自麋集毋勞開蔕徑

入小祇林門至此君軒穿竹徑度清涼界梵生橋

達藏經閣

衡門枕遊逕往往嚴扃鐫中有小年日不與俗客說幽
亭抱脩篁三垂碧於玦殘陽過林表餘映散瑣屑長者
所布金蒼苔互明滅徑窮勝自出地轉天亦豁白榆陰
銀河恍疑梵王設穹閣樹杪呈二藏各安列空王本不

空苦縣有真悅余本一蠹魚安能不自役

度萃勝橋入山沿澗嶺至縹緲樓

茲橋綰羣流并割三山半舉頭一峯尊翼者亦替漢下有突星瀨惟石鳥獸竄宵行或見怵燕坐出深翫窈窕逕復通蜿蜒勢中斷白石紆清流信意可枕盪稍南穴其背忽得天地觀却顧所入山依依在几案念此回環機欣然一笑粲

自縹緲樓絕頂而下東穿潛虬洞

高樓足怡曠展眺意已窮俯身狎鳥道側足探虬宮迴
光一乘隙羣玉皆玲瓏下漚湛湛流磐石居其中雀躍
三過之前復畏蒙茸西南一虛竇隱隱復溶溶遙與突
星會邇則天鏡通幽閒難久留吾將汎空濛

由西山別磴至乾坤一草亭西北望城樓西南望

武安王廟

沿沂石瀨傍十磴突平地本謂入山深那知出山易旋
螺結湫頂步武一茅亭俯看牆外隴鬱鬱黃雲平落日

滿麗譙粉堞尤羃歷簫鼓發叢祠野火起枯栢興盡欲
下來曲水弄餘暉忽過金粟嶺天香逗人衣

穿西山之背度環玉亭出惜別門取歸道

青虹跨高嶺雌霓隱其下傍穿度窈窕忽上得瀟灑釣
磯字忘魚亦復無釣者萬玉出素粧微紅露妖冶俄為
出山路使我恨眼蹙一步一回首誰能遽成舍

由月波橋而東望梵音閣

飛橋掛西嶺遙與中弁通明月組文波萬穎射鮫宮諸

峯一十二獻巧爭為雄奮肩若飢猊垂首如渴虹憔悴
欲沈湘飄飄獨凌風仰盼雲間質梵語錯青紅一柱錦
突兀孤峯玉玲瓏雖疲子猷接未悲阮逕窮

穿率然洞入小雲門望山頂却與藏經閣背隔水
相喚

迤邐山深洞盤石不盈步欲幡藏中言於茲可喚渡閣
影施峻嶒諸峯借丹雘迴屐探薜門介然見雲路陽崖
納綺照陰壑含冰返枝樛幄成結澗古藤堪度拊石何

泠泠爽然若韶護

壺公樓之背對廣心池之小浮玉

中奔固饒奇其陽頗隱塞未暢目界觀而以疲足力茲
樓既北啓恍若天地闊流峙賈其華明晦異昕夕當眸
小浮玉宛宛自為色呼酒一酌之與爾相主客却笑壺
公壺假幻成所適

汎廣心池穿散花峽之東泠橋

殘潦足滄浪沆瀣亦蹄涔況此魚鳥地俯仰見宏深刺

榜故有餘揚帆稍不任曲几列觥巖翠時見侵宛轉
娛暉渡徬徨嘉樹林飛瀑當面來勢若瀉千尋迴深斂
東峽高岸吐陰森輕颺散紅萼沾者酒自斟雖復拘方
士那能不披襟

度東冷橋蟹螯峯下娛暉灘

巖巒謝雄麗花竹入蕭閒點綴一二峯映帶遠近山醉
舉畢氏螯忽掣向雲間流杯石芙蓉鑿井青連環徑轉
目忽開焉辭足蹒跚藉磴坐青葱臨吐弄潺湲竊為忘

歸詠風流庶可攀

由雲根嶂之背度雙井轉嘉樹亭

躡屐穿雲根恍見雙明星下有百尺泉
轆轤破泓渟出沒沿澗幘向背臨溪亭
老樹何年植鬱作虬龍形逗雲擁芊眠
蔽日結沈冥廣池無煩暑曲檻有清泠
何必平泉石憇此酒亦醒

自分勝亭沿留魚澗度玢碧梁

孤亭介林端隱顯表異岐高樹上千霄
萬卉發華滋絕

澗若脩蛇屈曲復逶迤微颺激清波鱗甲忽叅差游魚
迷故逕落英戀迴澗絕壑架飛梁可以探翠微所至與
目謀焉知足力疲

由玢碧梁踰險得九龍嶺

澗窮路欲絕茲梁忽中亘下當舍身壑上當側足徑雖
爾蹉跎中悠然見宏勝偃蹇九丈夫相觀易為勁晨露
被膏沐夕颺發清聽生不願秦封但願不違性

傍廣心池為斂霏亭與振屨廊相對

夕景無不佳此亭有餘姿紫翠在諸峯迴光弄漣漪倦
鳥將趨宿猶復念渴饑鯨魚驚隙照羣躍不支持雖爾
近昏黃呼酒且自怡為樂當遲暮茲意將告誰

登來玉閣俯廣心池與西山對下為振屨廊

昔我栖茲閣茲閣臨廣池澄月激文波灩灩破簾帷攬
衣起徬徨恍然見三垂皎鏡中天懸萬玉正參差下有
振屨聲故人筥中來屨聲一何厲語笑何柔怡為我標
來玉比德良不虧

文漪堂臨廣池前為小浮玉

崇軒俯朱欄脩廊聳層觀文漪緣颺起鯈魚時泮渙近
島如覆敦遙岫若層案聊攜二三子相與同茲翫青山
入我屋素壁光凌亂書以賞心辭咏言仍三歎

穿竹逕度知還橋入文漪堂

遙岡織叢翠導我穿幕歷鳥倦亦知還況乃遊人屐窈
窕得平橋夷猶坦紺席相慰目已飽相勞足初息有酒
故可呼無酒茗亦得

先月亭後擁竹前俯廣心潭

初日固自雄不如初月色諸嶺猶黯黯此亭最先得微
輝現眉宇潛穎窺間隙叢篠玉破碎澄波金融液呼杯
一受之晶熒若珠珀使我肺腑間廓如廣寒宅

答寄屠長卿

人固未易知知人亦未易之子非傾蓋興辭遠相媚謬
以良璞珍入眼豈為貴余本崎嶇者失身墮文藝龍卧
苟不堅奔走成晚歲雕虫不利人浮譏滿天地昌歎栖

江沚謬中聖賢嗜愧無瓊玖報贈言或可繼一念百里
間春榮與秋悴范生始文苑班公僅循吏安以簿牘煩
此中有精意

為張叟題聽庵

山神饒伎倆時時惡聲進吾子既庵居不聞亦無盡云
胡以聽名徒然擾方寸自言百不入一唯天是信既傳
天聽卑復道天語近五十命已知六十耳當順自此從
心年的應無悔吝我語君莫聽君聽我當論何以絕聽

根悠然空五蘊

張山人寓侯先生適園得詩廿二首見示因留宿
我弇州園五日而贈以此詩

讀君適園詩留君弇園住試拈弇園景何如適園趣往
往清夜游亦有曹劉句所少但乳柑乞栽三百樹

題三笑圖

蘇子瞻題三笑圖不言為何人後人引以為虎
溪故事而謂為陶靖節遠公陸脩靜者或是宋

元嘉初陸脩靜非梁普通中陸脩靜也吾嘗游東
林寺其前一小溝潺潺流一石橋踞界之僧指以
為虎溪然太近恐非故虎溪也其面為香鑪峯蒼
翠拂天此畫景不甚似而人頗古雅戲題一詩
遠公白蓮社鬱若人天師破戒飲陶令違誓過虎溪遠
方一大笑陶意竟攢眉乃知病維摩不受彌勒窺何物
陸道士千載亦傳疑

王鴻臚同穀乞歸以養母也黎惟敬內翰合燕中諸

名士以詩送之而題曰青山招隱屬不佞次焉
昔讀招隱篇白雲栖桂樹矯首望白雲吾親在其處是
以夕上書朝即挂冠去陋此介推怨龍蛇安所慕笑彼
東方達朝數終何據躬耕慧山麓菽水足旦暮身隱竟
焉文吾詩耳當汙

安履山房二章為醉夢生賦上言感下言適也

吾聞天池生宏覽周九輿躑躅公車門生不與願俱委
骨傍要離雖俠非所愉顧瞻長山趾可托千載軀玉樹

埋土中誰能廢歛歔有子不逮養茲焉恒結廬喟此泉
下悰畢力共掃除慨彼塵中觀委懷在詩書悠哉復悠
哉成子山澤癯

其二

丙舍依墓田丁年托林藪平湖吐吾前崇山障其後蒼
翠日夕滋時能逗牕牖梅花及桃李谷量若升斗造物
使之奢何必皆已有主人不恒出出則呼顧叟緩步以
當車信足足不負是故安履名無妨徇俗口益以廢丘

瘠與室長相守

答汪子且志規也

和璧不易採驪珠誠難摘當其入手時天地為動色豈
無秦廷念所戒在一失重禍戢其光懼為狙者識是以
希世寶往往韜山澤

其二

我我巖桂芬因風來拂鼻冉冉谷中蘭幽芳當自媚受
質寧有殊疇能違勢地今人貴錢刀古人貴意氣韋布

而千秋默成乃為貴

其三

東家鍊凡鉛將用給其貧西家富丹砂鼎鼎雜然陳未
窺先天旨安能妙形神彼妄固已妄此真詎云真彼妄
特誤人此真將誤身

明卿以古詩見貽謂同日得吾兄弟書且感子與
之計辭旨酸楚僕所倚和幾不忍讀矣

北風摧雁行一飛一栖止雖不罥網羅相距數千里噉

噉雙鳴聲何當墮江汜賴此同心人徵絃寄流水俯仰
天地間慨焉數知已晨宿次第沈夕照易遷晷毋為往
者歎來者孰離此生味日以滴代舍日以圯抱此百世
知有涯誰為紀荆棘旦暮長幸其當塗軌寄聲勉加餐
相將保田里

孫節婦壽言

高材孟堅妹節烈孫奇婦心將髮共素影與燈相守玉
潤王家郎再拜前稱壽右挾彤管書左操巨羅酒試讀

五貞篇疇能如母否

張芝果孝廉來請大司馬公志銘成一詩送之因

訂後約

漢有張釋之賢聲騰九棘長公乃不然一官即成擲清
朝視三釜永晝耽六籍長者多造請公子敬愛客高義
薄雲天誰能不披憚今晨孝廉舩繫我祇園側布帽籠
悴安欲請復推抑天子所賜瑩先公將就窆片言借華
袞千秋垂金石搦管辭不慚終篇淚潛拭庶幾王生語

少酬廷尉德挂劍倘有時共飽東湖色

為范母題晚節寒香卷

離離澗傍竹英英離邊菊芬不逐衆卉榮不依凡木凡
木豈無陰衆卉先競馥疇能傲霜霞誰歟安幽獨中色
比黃金清心映碧玉所以范母賢挺然範閨淑天澤豈
不廣晚施意仍篤嘉命播中州清風藹然郁太師倘有
陳彤管將見錄

奉和諸真有待無待篇

翔龍曜金景靈旂逗珠樹廓落兆里遥和颺藹然度有
待不即來無待來何遽無待有待間或來仍或去強作
無待觀內深有待趣聚幻如聚真真往幻常住翹盼玉
清闕太上不我顧回首方寸鄉靈真不我駐是以無待
門長繇夸者誤

寄顧山甫

山甫山澤癯也歲杪見過新詩斐然近聞客謝
都尉所成二章寄之

君是吳閭人不踏吳閭跡
野菜佐蒸藜一飽枕白石
歲邸偶相見眉宇寒山碧
却笑柴桑叟被人喚彭澤
名者果何物於身了何益
新詩不杜機終難辭物色

其二

晨起便無營寧為晚饔計
青山不礙人藜杖信所憇
酒半雙頰紅往往吐豪鷺
譬彼咏荆卿毫端劍光至
調笑主人公俠兒謝都尉
但作蓬戶觀朱門豈為累

何仁仲鴻臚千里枉駕杯
酒論文甚適也亡何乞

一詩以別余感其意聊為贈之

楚產日以良千里申所嚮談鋒永嘉後詞格黃初上吾
愛次道真幾欲傾家釀榜子語潮生翻令結惆悵

其二

之子通隱流乃僻千載慕不愛叔夜鎗攜余一詩去却
愁沅江濶風波日云暮余光久以淪蛟龍不成妬

苦魔嬌

我昔魔宮屈所作無不獲魔事偶然止亦得暫休息今

我厭魔樂皈心向空寂魔仍不時至分我清淨席我自
忽為魔魔豈強我即但令一切空無縛亦無釋魔當住
魔天我當安我宅

和蘇長公南華寺韻

身自祖戒來未識祖戒面偶然賴拈出一見不再見紫
馬白玉堂所得等露電鯨海人鮮灘厥藥始瞑眩悔不
先師禪蕩蕩一白練濡首六欲塵驚心九重譴云胡嶺
外歸綺語紛如霰但使能所空何煩焚筆研

和蘇長公妙高臺韻

佛印老禿翁片言拄蘇子禪牀咫尺間忽擲千萬里不
解絃中調如風過牛耳却望妙高臺差我挿天起俊鷗
摩空沒波平四如砥意氣稍得舒歸來對隱几卷我廣
長舌避汝堅利齒初若錐遇錘契則針投水欲識蘇子
誰長爪梵志是不向無智生寧向有智死

遇故將軍素澤知其為太常柳莊先生裔也因出

洪武永樂中諸賢所貽先生詩文示之且贈以五

言長體一章

汝家老天綱逆旅識馬周
鳶肩復火色騰上不久留人
主狎片言車前呵八騶耳孫曰
庭玉間行至幽州文皇
薄朱郎釣竒出旁搜環衛十二介
一一雄貔貅中有天
人姿胡髯挺如虬太華壓千巖
海王朝萬流再拜獻禋
符契若鉢水投老官太常丞不
愛鳴雌侯象賢如客師
宛爾紹箕裘邂逅覩之子倜儻
非常流自云少衿裾亦
曉攻墳丘獻書光範門十上九
不酬是以飄然去立挾

南夷酋金印垂入腰棄之若蜉蝣落魄宇宙間恥與鳥
鼠儔晚知太常齋令我慨前休示汝卷一編汝當思聿
修七尺長彪軀燕頤仍虎頭未審投筆時亦曾攬鏡否
吾聞公侯始其後必見收七葉鳴珂巷帶礪等河丘往
往靖難勲昔受若祖謀勿孤人相編貂蟬在兜鍪

張幼于舍別墅為言子祠敬用志媿

句吳誠佳麗其始未雕朴三讓道故尊居然一魚服人
文萃東魯垂暉耀南陸言遊遂北學與商獲偕日以彼

絃歌化革此諸離俗

專諸要離

遂令大江表儒林被膏沐洵

美張仲生尚友一以篤家有五畝宮傍托素王宿願言
祀言子寒泉配幽菽竊陋法護施庶希范氏躅文學千
載標沾沾意良足俎豆乎其間非子誰當屬

題沈啟南畫林居圖和韻

春風蕩蕩鄉國徧地成小草豈不養浮名末路難自保清
泉激幽賞長松托遙抱念彼先達跡空為後人悼青山
一見屬方知此圖好便欲移住之與山長不老絕勝中

書堂二十有四考以為黃鶴樵此樵葉圖早是故必隱
淪白石翁所造

即事

夜雨瀼瀼來與漏相終始不驚少年卧偏滴老人耳陸
沈漸相迫天漏猶未已西隣曉吹罷白粥清映底今年
猶自可明年飲寡水東舍得順風號呼應鞭筭可憐徵
求骨共作魚鱉餌忽逢黃冠客叩門談玄理燒金事已
謬碑穀謀可恥那能一身活坐看羣黎死

弇州續稿卷五

欽定四庫全書

弇州續稿卷六

明 王世貞 撰

詩部

五言古

奉題師真十札後

圓溷游蛆虫夾然謂清冷即且甘其帶了不悟腐腥擾
擾蠻觸間忽已迫頽齡和壁點來多無地不青蠅幸遇

慈悲母憫念我頑冥灑以甘露津挽我胎氣零授以黃
冠絛繫我垂解形密契托盟辭彷彿夢乍醒累紙皆小
隸煜若周天星至寶雜流沙誰能簡其英紺縹白玉軸
奉之同六經月窟驪龍居所至必服膺得魚良世覲忘
筌豈余情

答帥禮部機

武夫各自珍片言別和子款段以康莊目前棄千里日
余成苟步迷陽來見枳一飽清泌流杜門掩其耳夫君

厭承明分曹佐三禮俯仰六代間愀焉歎茅靡思祛青
雲尚遐結中林軌開械何所有有蘭復有芷雖復重襴
之芬芳不能已金陵羣少年斷斷鑒其齒自非曠士識
安能排衆毀佩璧寧佩瑕買駿寧買死千秋自有伸誰
能更論此

授產兒輩作

今日何宴會畢享餽其餘兒女前跪列手授一束書汝
祖饘粥資非窘亦非舒齋中歌九友汝父日與居棄之

忽若遺不復意躊躇緩步西南去落日照精廬一瓢挂
空壁其樂當何如

其二

仲兒僅十三少者乃十二頗解學佔畢不曉人世事一
旦付以家母乃為之累吾患在有身况彼兒女計興者
任其興廢者任其廢何必學龐公盡拋洪濤内斗大一
團焦寬然若天地

其三

吾笑向子平讀易無多日既欲遊名山何待婚嫁畢向
平亦笑吾汝能棄家室胡不蓬累游局如禪中虱但令
方寸寬彼得此寧失不見阿閼界掌之置容膝大有終
南人白首為名役

病瘡作

今年氣候惡瘡鬼何太橫三家兩家泣十人九人病延
醫醫伏枕呼覲覲不競余方侍師次驟熱如就甑杖劍
叱此鬼么魔當敬聽速各歸其所毋為索余縈鬼拜前

致辭小邪敢干正唯是旦夕間往往遠相傾坐卧必當
風果餌非時釘四大不自持三尸轉成橫不然吾曹力
焉能操公柄公但時自愛鬼當奉公命洒然夢初覺攝
念入清淨從此尼連河盡作四禪境

答錢功甫文學

錢郎嗜讀書巧若蜂采蜜發而為詩歌誦者齒流溢餘
事乃臨池入品果能逸新篇左司價小草素師筆

二公皆錢

姓三絕名總高一貧策安出掃葉煨地爐不暖懸罄室

湯藥近戢身晨昏長繞膝無心問月旦有口從甲乙貽
余游仙詠白雲為蕭瑟晚合方自憐況乃清狂疾胸際
祖龍火都焚惠施帙握中靈蛇珠翻從象罔失分無英
瓊瑤來美不酬一老余東山卧勉爾西京日

張伯起丈創悔世緣閉關繕性投詩見貽超然之
致聊爾有答

我愛張平子清標冠吳趨夷然忘四愁不復賦三都白
苧明下童寶玦酒家胡一草思玄篇棄之忽若無甘露

沃靈根蓮花產雙趺魔冤伏大力其始乃烏芻惜哉夸
毗子剎心趣塵途縱復浮名至是身安得居拂軫報知
音母令流水孤

謁曇陽仙師純節祠

皎月出高天團團照靈祠中有一片心晦朔長不虧秉
介在韶年抗節矢幽閨寧希世人是况乃論情私臨當
就羽化金剪裁綠絲芙蓉秀朝日根不棄塗泥過客盡
迴車而我思夷齊何必沾殷粟然後首陽薇智者快其

仁愚者惜其饑焉知非冲舉千載復來儀

弔徐郎新墓是仙師留髮處

鬱鬱徐壠柏盤盤若車輪新冢埋舊棺舊鬼作新人伊
昔盛年子薄命多苦辛結憤向黃泉千載永不晨何意
靈仙顧噓枯起沈淪雖靡蕭史諧不共韓憑倫留魄侑
純心逍遙於八垠匪直夫婦綱再迴父子仁過者無愚
詰疇不羞芷蘋嗟嗟一髮微其係乃千鈞

從弟瞻美保氏五十以詩代觴得古體四百二十

字

睢陵肇京洛始興振江介宏譽籠一時休風潤遙裔至
今青箱學猶擅烏衣最王父雅樹滋敷歷徧中外肯構
得若翁工冶差有賴惜哉君子澤徃徃食之既丹穴終
自深苞彩未云墜跌宕紉袴間瀟灑見吾弟頎然一野
鶴忽凌雞羣至十五二十時三日兩日醉百萬盤龍擲
二八桃花伎歌翻阿鵲鹽舞按迴鶻隊胡笳作人語羯
鼓解琴穢時時沈冥中徃徃露狡獪中歲稍折節讀書

獵大意晉談自風格吳粧出姿制姓名借客重裘馬從
友散雖靡公業田而耽文舉會手折馮驩券身避周赧
債任俠鮮倦時問產無完歲偶沾一命榮肯作五斗計
溫清幸無缺甘旨巧自致何必欣捧檄然後成毛義伯
仲不待年遺孤我衣食餘澤霑閭左英聲嘖朋輩余解
山南節頗諧道州契花發不孤賞玉顏或先睡醒讓白
眉良醉思火攻利汝衰俄開五髮宣面猶晬相與追曩
者彼此如夢寐懸弧嘉平末在冉見春事瑯樹十萬枝

枝枝吐新媚北堂勝事饒南榮賞心萃芳壓珊瑚滴寒
凝水晶膾燕寢瑞龍涎中宵鳳凰淚是時月過午長庚
蚌珠配老余慕獨醒對汝謝尊解却聽萬年酬問解羅
衿未母論爾知非亦不解我是醉者與醒者各各葆真
氣競揮魯陽戈頓挽羲和轡從此無累身相將共天地

自警

飲光跡樂章形天舞干戚業從定中現死作生時劇習
氣苟尚存窮劫猶未息所以西竺言蕩然淨八識而我

獨胡為苦搜紙上跡淺或解焚誦粗能節衣食忽起人
我相紛紛填胸臆雖或祛之早猶恐中伏匿焱風突如
來吹入羅刹國惡固不可為善亦竟何益善惡了不思
如如湛常寂

郁人文棄諸生見訪道院

憐君負奇尚抱膝梁溪濱一日成黃綺千秋安素臣訪
我白蓮社啖之青澗蓴春風穆然來小語破沈淪何必
呼濁酒然後寬君顰

匡南王孫爽臺

襄王意不憚與客登蘭臺倚醉納雄風披襟呼快哉時
無宋大夫俊語為飄埃朱邸出豫章阿閣表崔嵬瑤階
拔地起寶楯中天開一葉將秋氣疑自匡山來沆瀣日
夜零注我芙蓉杯一吸潤枯肺再舉化濁胎主人仍郢
倡和者皆仙才笑彼吹與繁日夕市塵埋

題懷白草堂為朱王孫賦

知白啟玄宗醉白慕芳規詎若瞻君宇宛然白華思同

姓諸侯王汝父皎不緇河間茂經術陳留摛令辭墨書
一見旌不億稱宗師斯人老空谷朱邱垂素絲最哉念
美牆母令墨子悲

感事偶成

燕坐環堵中蠅聲雜然至世路豈我妨物情各自為有
身亦何患無諍乃三昧瞬息風雨過冰輪絕纖翳加我
我不戚語彼彼轉恚一飯兩粥餘飽即騰騰睡

贈無住道人徐孟孺

孟孺強余顏其羯磨之室余謂孟孺於道可謂
精進矣第其居平敦孝友則思齊曾閔堅操履
則思衡憲次精訓詁則思凌服鄭工文字則思
楷左馬雖種種善勝於相若有所住者茲舉將
無類是乎審爾恐無以當竺乾古先生玉宸大
道君首肯也為顏之曰無住而系以數語

汝不從相生亦不從相滅云胡為相住幻作一切法有
住闇室中觸眼不見物無住日麗天疇能遁毫髮六用

時現前真空了不涉超然三界外何縛亦何脫我本綺
語人年來畏犂舌為汝說無住乃至無可說

晨起作

秋夜初未央秋暑漸已辭籠雞養來懶欲啼復何遲是
時盥漱畢皈禮三界師首開貝葉編清梵珠纍纍金剛
般羅蜜觀音陀羅尼大易老氏經人天所並持讀罷出
中除海色正希夷黃庭發清唱餘音逗迴颺稍稍見東
林徐徐吐半規山蔬佐脫粟啖之甘若飴灞橋霜滑處

景陽月沈時小亦錐刀競大則軒冕羈而我獨何幸獲
與木石居四體豈不勤中心澹無為一住五百日所得
寧可訾肯學漢太常不齋便如泥

題子威侍御贈其宗人劉大恒詩後

子威手真誥時諷運題象激詭慕元跡熹微倣清唱頗
矜南華博亦取歲星放把臂中壘生宗盟欣詰匠志凌
絳庭杳氣挾玄圖壯將無鴻寶噉不惜驪珠貺余叨塵
中晤未解無始障是以安挫名怡然餐物謗所虞江乘

世苟免曼都誑去去勿復輕鼇趾有風浪

題離資園小山

離資園之壺隱亭小山東西僅三丈南北半之
高不能二仞中漚一小池南北僅五尺東西半
之而下有泉脉非大旱不至涸中藏磴嶺澗壑
橋梁之屬皆具體而微遂名之曰壺隱山為賦
古體一章

昔余陟叅山秦楚寬自坼大小七十峯峯峰插空碧紛

來眩目境獨徃疲足力及乎汎洞庭黏天四無壁日月
涵兩丸魚龍蕩九豔如何舉武間亦具仁智德泠然一
蹄泮緣以數拳石窈窕若徑庭沿洄似無極步步苔誤
綦時時蔓鉤幘山礬作古樹瓦松僅盈尺不任祖龍鞭
寧堪巨靈擘被以澗嶺名居然無慚色勿歸壺公袖為
我媚几席昔覲何足奇天地有時窄

黃憲子先輩弱冠受知吾家敬美今年秋閏過吳
門扁舟訪我弁上出所撰臨華新草及北征稿

讀之蓋洋洋矣賦雖吐一斑足窺全豹靈光洞
簫將來當不過此至於近體出入初中時挾梁
棟之氣不耐點檢恐指南之車切玉之劍未便
可已也僕既欽其才嫩其志因成一章以效微
箴憲子當不逆耳哉

威鳳雖未儀其彩必九苞誦君河東賦煜然見一毛矯
翼叩天閭長鳴瑞聖朝大雅既寂蔑正始出劉曹齊梁
傳脂澤膚立復牙聲景龍闕康莊天寶挺羣豪體變雖

尚俳骨勝神自超子其慎爾趨通蔽勿輕殺璞玉希連
城寧辭剜琢勞

楊翁八十述壽一章

昔多長者游弱冠忝公車是時楊翁父業已八十餘啖
我園中橘酌醴鱠神魚翁時侍其側恂恂復怡愉轉盼
能幾何翁壽差亦如已損負郭田僅存立壁廬人是義
皇人居即畏壘居但貴心樸誠何必口詩書笑彼夸毗
子營營錐刀趨所竊若已盈所得無乃虛勸君安桑梓

化日正舒徐

仲氏棄官學道投詩見依抒此為答

三教星月日精光或相鑠識者探其真從乳出酥酪么
麼任蛙紫法象炳丹雘仲氏窺甘源欣然頂門勺至味
中自賞大飽無餘嚼朝疏發散函夕舲下伊洛豈伊微
罪好徇此孤臣托置網彌川原那能篡寒廊鴈序中所
私鴻冥偕足樂世親皈大乘其自雖無著玄奘梵天來
長捷潛井絡駕言定錄君仰資太元格竊窺遠游品翻

與思玄邈從義兄則安當仁爾母却所虞皦皦地象罔
竊真藥

其二

大道寧徇人俗情能不睽安見汙潦內有物吐虹霓茅
翁答叔申調達謗牟尼肝腑不相燭何況大闡提名利
巧愚人往往使識迷喧如百蚊蚋溺若一醢雞寶彼九
秋條謂等三春萑俯仰天地間慨焉思夷齊吾弟稅輜
軒改服友鹿麕竦身二華巔紫氣為之低濯濯青蓮花

以根拔塗泥而我尚攻中焚結不受觸西畏弱水航上
慚玉京梯晚途僅自克何肉與周妻耕則共地肺居則
保天倪

腕瘡劇病不寐戲成示敬美

冉冉月墮櫺浙浙竹敲瓦呻吟不成寐數至街鼓罷我
羨畢陵伽視身如土直拚此半殘足博得全般若四大
非我有誰為受痛者此義頗亦聞其如不能捨

前詩似欲得吾弟一轉語耳乃報札謂不能分痛

又云四大為累只得調耐因更成數語

後痛猶未來前痛已過去唯有刹那痛與我復無與欲
覓止痛者亦復不知處是以忽見寬寢息了如素循覽
分痛言將無手足故與約更不痊割棄門外路

永嘉朱叟去吾州學正後五十年而其邑人陳子
繼之壯秀才遜學後先獲事焉乞余言為贈曰
東嘉繼美

東嘉比東魯禮樂何臻臻窺經見崔服問姓乃朱陳先

後博士師作我婁侯賓絳帳宛而舊青衿俱已新惟應
垂白者猶是守玄人

封君沈翁七十壽言

父書既讀盡遂讀天下書兩兒佩庭訓比翼升公車大
者汝南君小者承明廬脫汝白苧衫飾以黃金魚充庭
盡和氣遠膝皆璫璣有時寫八詠虹霞吐階除忽爾釣
四腮日月付樵漁能令紙價貴又使俗情疎楚澤縱元
緒魯門饗爰居喧寂太非性擬公安得如我有盈觴酒

微規以當譽願保四餘言永為百歲儲

辰玉應試留都賦此贈之兼贈孟孺

欲識操觚業為之無以為熟若轉丸蜨專則抱卵雞靈
臺僅一寸武火安所施

其二

棘日垂沒際秋榜將放時要須覓真我勿述未波馳一
番煅煉過大道將庶幾

其三

鹿鳴歌甫罷紅潮登臉色十里捲珠簾三衢緩金勒勿
起人我相須藉恬澹力

其四

徐卿子同好翩翩厲風翼今日雙南金他時契與稷母
輕露宵光世眼易為白

馮京兆先生挂冠其子咸甫赴公車言別需一言
之贈

馮唐厭郎署拂衣卧滄洲有子字王孫頗與史長游冥

志越三墳英風隘九州飄然赴公車甲第焉足酬三語
司空掾一疏富人侯鄙意稍不然良玉戒暗投不覩長
安市談笑生戈矛桃李駕春風獻態不自羞憔悴離根
株零落委道周竊窺松與栢偃蹇若潛虬鬱作清廟材
竟為匠石收出當承八柱處當傲千秋

答伯起丈見夢之作

張卿留侯裔中歲慕黃石螭觀一世豪消搖於八極寄
此漆園蝶薄彼天門翼宵分嘗夢余披襟話玄白恍若

楊侍晨親約子喬。語猶可尋。清徽條難。即起覲銀。
漢秋白榆。何歷歷。裁詩紀相贈。意我或有得。而我未解。
脫凡情。宛如昔。焉能他心通。作汝屋梁色。欲馳樂令。駕
一解衛生惑。試觀醒後身。何如夢中覲。

宜興吳詹簿見貽山海珍錯走筆為謝

巖卧應未深。故人跡能繼。雖辭何屑肉。尚餘許詢餽。麋
膾披玉鮮。茵陳縷絲細。食指了不驚。饒口喧兒輩。亦知
人天供。奈此禪悅味。

為汀州王別駕大頤贈彭司理而珩

漢庭貴張趙文吏爭讀律吾獨愛彭宣時時飾經術
霖使車雨晶濛訟庭日數登謝公樓一揮始興筆推按
汀溪寫柱笏西山入別駕老安豐為余頌畫一乞詩代
虔刀三事行可必

歲暮即事雜言六章

晨粥盪一甌饑即煨芋栗擁衾就曹騰瑾實避蕭瑟守
令不見存山人無歷日有歷固自佳無歷亦不必誰道

不知年新年是初一

其二

七尺虎軀將自言能學道舌底吐蓮花心頭發殘燒東
家怨除目西家盼邸報欲出中既熱欲處脣亦燥何似
兩不關遽睡一覺

其三

衝寒裹頭出剝啄何太緊徵詩勝徵稅責文如責進才
枯思復竭拒之則不忍何不焚筆研深山採薇菌慳心

久已無名根或難盡

其四

名場走豚犬秋風偶先登乍聞亦欣然門戶或可馮雙
眉豈必蛾謠詠從此興兼復天雨雪時時念凌兢記取
未遘時廓然泯愛憎

其五

天地豈不仁來為鄉邑讐疫鬼日夜侵盡室委陽侯長
吏佐凶歲存者復繫囚丈夫具七尺豈但妻子謀朝粥

與夕蔬一飽良足羞

其六

玄冥多駭駕羲魄鮮停軫故人偕密戚落落晨星隕沈
淪醯中雞促數露下菌新事久已知偶然生不忍却顧
淨居天花冠亦萎頓

送周子禮太嶽玄帝宮

北極下明神寄治參之峯金宇薄太清玄旗散靈風皇
王隆秩視萬姓皆朝宗周郎江東彥冥心事真空胡為

挾辦香竭蹶趨其宮我聞天大將九有托帡幪焉知非
冒索現身於其中最爾醯雞士窺管安得通最哉顓子
思歸語將無同

即事

愛弟不赴官頑兒不登第世法若小虧於我乃私慰積
陰乍收豁春風滿天地大家團圞頭相與明得意得意
者為何共此恬憺味

初晴策杖東郊作

二月行欲盡寒陰始微蠲今朝策藜杖行散步郊原何
不命濁醪亭午自醺然柔綠猶未勻枯枿乃望妍造物
不自功偶然成後先但使受噓拂遲莫亦何言

為印師設夜供偶然作

適聞印師歸咄嗟供草具燕筍斲春雲枸杞吠朝露辛
香溢楚芹柔甘調薯蕷徐進宜城粥玉脂戀湘箸何必
五鼎烹所得良已飫回思鵠形子半菽猶未固一甘縱
足快萬古誰為度與汝誦五觀毋為口腹誤

後雜言六首

食肉無馬肝不為不知味
飲酒無葡萄不為不成醉
軟飯一兩甌飽即熙熙地
濁醪五六杯醺即騰騰睡
毋論昔者非但曉今者是

其二

有產不能問粗足供朝暮
有子不能教亦足知門戶
屈指無累人眼底殊有數
不畏去時景不覓來時路
役役筆研間終為阿堵誤

其三

朝禮觀世音夕禮阿彌陀不願乘金臺不願產蓮花聊以銷宿懣攝心使不它貴人背相笑禪者面譏訶我亦不敢言自問各如何

其四

割肝救父疾父愈喪其身捨身餒虎虎飽噬千人怨親雖殊致違道恐亦均孝者信其孝仁者信其仁古聖賢為之我則何敢論

其五

由來大乘地不踏小乘徑滿口說大乘何曾有一證或
請丞相田或借中涓柄開筵珊瑚擁發篋黃金迸未必
小乘人肯作大乘行

其六

客有冠蓋來彈我談京洛昨日頌伊周今日詈莽卓或
笑佞人非或嗤世情薄自古良已然二端俱不錯是以
潁水人洗耳安寂寞

偶聞有薦予者兒子自公車書來徼及出處一笑

答之

君平昔棄世歸從此心卜採樂北山阿誅茅南澗曲事
佛始解勤愛書亦不讀昔者甘白簡今何叨薦牘縱令
借作眉豈堪下同目汝意或難肋吾事已蛇足終入壺
公壺長伴鹿門鹿以此無競心塞汝有竅欲尚愧未忘
言何如坦其腹

有薦新蠶豆櫻桃麥蠶者邀印師共嘗之戲成一

章

麥秋麥作蠶蠶月蠶名豆豆作綠珠圓蠶似碧玉皴家
老憫我饒傾筐前為壽櫻桃況初熟可以佐春酌念無
水晶盤寫自翡翠裘野人欣及新儉歲享慚厚印師獨
不然入口如傾溜天厨與貧里等付一飽後迦葉須菩
提安心分去就

送顧子韶臬使之山東并為故人李于鱗子駒有
托

昔我游濟中于茲二紀徂叨陪雪宮宴地底噴真珠鬪
電跑突泉弄蟾大明湖東南華不注灼若芙蓉數間攜
濟南生促膝黃公壚捲波白浩蕩瞪眼青模糊回首萬
事空千載亦須臾君今持節去奄有齊魯墟齊風復泱
泱魯道不崎嶇惜哉絃中雪不與寒山居倘式元禮門
長松餘幾株竊申孝標愧為我撫遺孤

沈鐵山先生葬光福山輓歌一首

沈約千載人風流一朝息素旌發吳江送舟傾原劇鄧

尉聊卜鄰光福棲真宅黃鳥聲自悲春原樹為白埋玉
向土中誰能不心惻寧知龍變化夷猶於八極

感事

山鵲營樹顛壘枝猶未固一雛復一雛宛轉伺其嗉毛
羽尚未成忽去不返顧縱無矰弋虞歲甦恐中路念我
非慈烏焉能希反哺生自當風喧為人慰朝暮

壽安母王太孺人六十

夫人相國孫婉孌閑內則及乎佐安秉素封日從闢七

誠以次脩千指欣受職從夫既已榮誨子乃終吉翩翩
宮彩衣昔從斷機織嗟嗟大官供復自丸膽得何以萬
年觴膝前雙白壁

族孫亮臣少而孤伯子詹錄教之成鄉薦賦贈伯
子

儀部昔彌留手撫二尺孤豈不念芳馥疇當庇其雛有
梓代為喬結廕亘天衢風霜不見侵雨露日夜敷青蔥
兩玉樹慨此同根株既成孝廉名重為割膏腴千秋許

少府友讓名不孤

為襄王題中和軒

天運不暫息
辰樞秉貞凝
陰陽長調暢
品物乃流形
一哉君王心
偏陂了不生
坐見春風來
熙恬順吾情
所以陳思訓
中和誠可經

為襄王題懋德齋

高齋何沈沈
君王養淵默
徵姿却鄭袖
選藻疎唐勒
峴山不自高
漢水何知益
極目平楚遙
油然被膏澤
乃知

大王風來自君子德

題襄王收春臺

春風何處多城東大隄路君但收春來莫便留春住散
作襄陽春煙花十萬戶

題襄王含春亭

初曦啟羣象茲亭獨先得君子感退藏翛然閉一室珠
玉豈不光含之潤山澤

題坦菴老人詩畫冊為甥金博士

坦菴一老人蕩蕩躬履素里多明哲士琅琅相標署詞
翰猶若新人與庵非故居易仰前修宅平諧所慕介然
桃李蹊迷陽安得妬方寸苟不夷羊腸起中路寄言宅
相子毋為狹邪誤

洪山人自永嘉偕肖甫司馬過吳門輕舟入訪云
將入燕赴平津之約余時病起為蔬食以供從
容久之因成一章為別

白日麗中天群星環北極麟鳳既郊游猿鶴不遑息策

杖辭永嘉呼舫凌震澤欣陪元禮濟將首顙君席余時
病初起蒼苔繡行跡一刺破衡門胡床下東壁暫割周
顓嗜聊克井丹食宿醞桐乳濃新炊菰米黑飯罷何所
為嗒然竟日夕空名無可借實際嗟何得試看眉宇間
寧無首陽色

先師移龕日忽已三周晨興作供感歎有述

昔在歲庚辰仲冬月二吉于時自徐墓少女風轉疾冒
雨扶師龕倉皇以身相密幕無際雲熹微露隙日條爾

四垂淨熒然一星出千旌鬪續香萬戶奏芬苾師龕既
已奠余亦寧耳室雖謝衾枕殫而多筆研役厭事事轉
多問心心或軼良友多中潰墜子時見嫉三載俄已周
所得無一實夜雪射晶熒晨霞吐鮮霽彷彿靈駕過能
無內慙怵更矢蹈海言仰希出世術將從咫尺地汎掃
萬緣畢

見有演關侯斬貂蟬傳奇者感而有述

董姬昔為呂貂蟬居上頭自誇預帷幄肯作抱衾裯一

朝事勢異改服媚其仇心心托漢壽語語厭溫侯忿激
義鵲拳背裂丹鳳眸孤魄殘舞衣腥血濺吳鉤茲事豈
必真可以快千秋旦聞抱琵琶夕弄他人舟售者何足
言受者能不羞寧如楚虞姬一死不徇劉

周子家會稽獅山傍因以獅屏自號其游吳也諸
生多從受經魏子請余賦之

會稽有獅山之子廬其岫生平富經術所至必教授精
言散不亂雄氣攝羣鬪壇專師利座義奪法王吼霧豹

奚足言雲龍終有遘何必擁臯比諸生羣且就

題贈虹臯子

昔覩蓬萊虹維時午初霽恍若梵天橋旌拂擁螺髻有
橋吳江湄列星七十二連蜷下飲水天矯垂虹勢結廬
棲近臯之子托深契文彩成五色中含不平氣雖等望
雲渴毋取貫日銳變幻俄頃間造物小兒戲何似以橋
名千秋恒利濟

題海峯圖為故金同文先生作

六鼇既失守十洲俄半摧蒼然東海色忽墮一峯來
插雲斗柄出浴日扶桑開停琴聽洪濤乘桴問九垓
魯連無世念安期有仙才高踪不可即披圖良快哉

張秀才母七十


夫人昔歸張中道損歡讌清心玉同潔勁節霜不變有
子熊丸訓早登鴻都選歲裁尚方服日割大官膳夫人
不色喜謂爾必陳善持綱忤上宰積媯承嚴譴相與耕
綿田夷然了無怨今來賜環日再展添籌宴欲知孟母

賢請誦子輿傳

用韻自警

寂爾當春晝恍然現余過僅曉身外師不識師中我逞
筆亡所裁幾復釀語禍迴塗塗轉迷蹈海海仍苦所執
但空花而乃希真果俯慚抖擻念仰愧慈悲父名欲一
線牽百僂成子母按之若微細任之終失墮真一苟有
虧畢生莫能補冉冉崦嵫照沈沈北邙土不解去日愁
為昧來時路試一喚王生王生必回顧惺惺與昏昏兩

反當兩助於此尚因循賢聖莫能度



弇州續稿卷六